



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Tanü Rahul Gandhi-i Surat court
obendang anema ken o benoktsü

Petra Kvitova-i Miami
Open kokogo



VOL. XX NO. 171 (ADOK 171) DIMAPUR TENTONÜ (MONDAY)

RONGCHII (APRIL) 03, 2023

₹ 5.00

India nung nisung 3,824 dak Covid-19 putet

New Delhi, April 2, 2023

(Agencies): India nung Covid-19 wara ka ano sütsü akok ta tsüba bilemba mapang ka nung Deobarnü nisung 3,824 dak Covid putetogo aser iba ya anogo 184 sülen nisung teimtiba dak putetba lir.

Tesüba ghonda 24 tsüingda putetertem züingsema India nung tang nisung 18,389 anepaludar.

Tanep 8:00 ako tashi nung India nung nisung 4,47,22,605 dak Covid-19 putetogo aser nisung pungu asüba züingsema tasür ajak agi 5,30,881 liasü ta Union health ministry-i metetdaksü.

Tesüba ghonda 24 tsüingda Delhi, Haryana, Kerala, Rajasthan aser Kerala nung Covid ajanga nisung kaka asü ta Health Ministry-isa ashi.

Tanep tashi nung Covid nung taneptsü angur ajak agi 4,41,73,335 lir ta parnokisa shisem.

Tesüba hopta ishika Covid agi kanga mejungi kongshiba state temji Kerala aser Maharashtra lir.

Kerala nung nisung 4,953 aser Maharashtra nung 3,324 tashi coronavirus agi shiranga anepaludar.

State ana sülen Gujarat nung nisung 2,294, Karnataka nung 1,259, Delhi nung 1,216 aser Himachal Pradesh nung 1,196

anepaludar.

India nung H3N2 influenza kanga puteta aruba mapang ka nung tesüba hopta ishika nisung aika dak Covid-19 putetogo.

Ajisiüka medical experts aser ketdangsürtemi kangabo maoksatsü shiogo aser Covid inyakim beshiba den vaccine indang booster shots agitsü metetdaksüogo.

Nisungtemi influenza virus menar sernung Covid-19 asütsü akok ta temulung melemi bilemba tendangba ajanga kanga dang ajungbena nisung aika dak puteter asütsü akok ta mongintemi ashir.

Külen, Centre sorkari state aser UT shia dang April 10 aser April 11 anogotem health facility ajak nung mock drills agitsü tetuyuba agütsüogo. Iba ya hospital infrastructure, (oxygen cylinders dena), PSA plants, ventilators, logistics aser human resources renema aliba metettsü atema agiang ta parnoki ashi.

Union Health Secretary Rajesh Bhushan menden ser kanga dang temaba jenjang nung senden ka amendang iba tetuyuba agüja liasü.

India nung COVID-19 vaccine indang dose 220.66 crore tashi agütsüogo ta Union health ministry website nungsa shia lir.

Mokokchung District College Students Confluence' agi

Mokokchung, April 20, 2023

(TYO): Mokokchung district kübok college 4 kaketshir telungjem longjemer '2023 Mokokchung District College Students Confluence' (MDCSC) ta sür sentong ka agiogo.

Fazl Ali College Students' Union, Peoples College Students' Union, Tuli College Students' Union aser Jubilee Memorial College Students' Council longjemer iba sentong ya April 1 nü "Meraki" (the essence of oneness) omen dak rangloker yangi FAC nung ayongzüka kaogo.

Sentong nung taoba Chief Secretary, Alemtemshi Jamir IAS Retd. tongti tejaoker liasü aser pai kaketshirtem dang iba ama sentong tajung ayongba asoshi pelaba den iba ajanga kaketshirtem kati ka metettepa shisa jenti angazükteptsü imlar, ta ashi.

Paisa lungjema aliba tongtibang, asen maitsü (identity) wazüka ayuba den taküm liyonga aotsü asoshi tetoktepa nela, technology renlokba indang, tanü lokti nung temelenshi nungdakba, sütepa litetba taküm aser Tsüngremer sayatenyatem indang, item onüktem nung

ajemdaker kaketshirtem ayongzüka.

Iba sentong ya taoba mapangbo "Mokokchung District Combined Colleges One-day Event" ta nüngja jar Mokokchung nung college-tem telungjem nung alitsü ayonga aru, aji oda, tensa den apet tanübo "Mokokchung District College Students Confluence" ta nüngja melener agia arur.

Taküm iba sentong sentep ana kuma lemsar agia liasü. Iba sentong nung tetoktepatemji - painting, photography, poetry, acapella, cosplay, dance, folk fusion aser Battle of the bands liasü.

Iba sentong nung FAC Principal Dr. I. Wati Imchen, Peoples College Principal Dr Amongla, Asensor Jamir (Secretary, Social Services FACSU & Convenor Planning Committee MDCSC), Tushikaba (GS, FACSU), Tiatemjen (GS, PCSU), Wapangsunla Jamir (Convenor, JMCSC) aser ano tangartemia shilem agia jembü.

ANCSU Battle of the bands 2022 winner 'Decorum Disaster' band-ia iba sentong nung shilem agia liasü.

India nung tongtipang mozü aika jenjang tuogo

New Delhi, April 2, 2023

(Agencies): India nung chiyungtsü, tajemtsü aser anogoshia amshiba osettsüset nung jenjang atuba mapang ka nung mozü nunga jenjang tuogo.

National Pharmaceutical Pricing Authority (NPPA)-i Wholesale Price Index (WPI) ajungketba ajanga mozü 900 tema indang jenjang tasakba kumogo.

National Pharmaceutical Pricing Authority (NPPA) ajanga linük nung medicine aser medical equipment indang jenjang latettsür aser parnoki essential medicine 905 indang jenjang 10% nungi 30% tutsüogo. Jenjang tasenbaji April 1, 2023 nungi tenzüka ayoktsü.

Iba dak sendakba nung Ministry of Chemicals and Fertilisers ajanga sangdong ka agütsüba nung pharmaceutical company ajaki ceiling price tasenba ama jenjang latettsü temelaba agütsüogo. Taküm agi

küm anabubua India nung mozü jenjang atur.

Pharmaceutical company temi mozü nung jenjang atutsü takhangba agütsü ta Ministry of Chemicals and Fertilisers-isa ashi.

Ajisiüka, Congress president Mallikarjun Kharge-i Deobarnü mozü nung jenjang atuba atema Prime Minister Narendra Modi aitsüogo.

Prime Minister Narendra Modi-i nübortem ket nungi sen agitsü atema "supari (contract)" agiogo ta Kharge-i ashi.

Honibarnü Prime Minister Modi-i Bhopal nung sentong ka nung jembidang nisung kari pa tenüng menüksütsü meranger aser iba alizüing atema "supari" (contract) agiogo ta jembiba sülen "supari" (contract) Kharge-i iba o meyiptsü.

Jenjang tasakba akiimba drugs & medical equipment:

- Paracetamol tablets, syrups and injections.

- Antibiotic drug Azithromycin, Injection of Tramadol given to reduce pain, DPT vaccine, Folic Acid related medicines.

- Tetanus Injection, Vitamin Medicines, Doxycycline Medicine.

- Amphotericin B, which is used in the treatment of black fungus.

- Diclofenac and Atorvastatin given to heart patients.

- Amoxicillin, common antibiotic to treat viral fever, has also gone expensive.

- Progesterone medicine, Calcium Carbonate medicines

- Condoms

- Insulin pens for diabetes patients.

- Glucose and Sodium Chloride given to hospitalized patients.

- Stents used to open heart blockages have also been increased. Bare Metal Stents- Rs 10,509; Drug Eluting Stents' one unit - Rs 38,265.

AK Mishra-i TIPRA Motha den interlocutor inyaksü

Agartala, April 2, 2023

(Agencies): TIPRA Motha-i Greater Tipraland akhangba olemteptsü atema Centre sorkari taoba IPS officer AK Mishra interlocutor shimtsü.

Taruba hopta Centre-i AK Mishra tenüng yimjak nung metetdaksütsü ta osang ajanga ashi.

Union Home Minister Amit Shah-i March 27 nü TIPRA Motha indang takhangba onük atema interlocutor ka shimba osang metetdaksütsü ta TIPRA Motha tanishir Pradyot Manikya Debbarma-i March 23, 2023 nü shia liasü.

TIPRA Motha-i Tripura nung lispur lakh 14 indang

tebilemstütem aser khurettem atema 'constitutional solution' ka meshir.

"Union Minister Amit Shah-i kü dang March 27 nü Interlocutor ka shimtsü aser pai Tipraland takhangba aser 'constitutional solution' atema inyaksü ta shiogo" ta Pradyot-i shia liasü.

Mizoram nung Home Minister Amit Shah dak wako tanak ayiploksü



Aizawl, April 2, 2023

(Agencies): Union Home Minister Amit Shah-i Honibarnü Mizoram yimtiba Aizawl semdangi arudang Congress züingsemtemi pa dang wako tanak sayua lungkak ait.

Congress lennir Rahul Gandhi Parliament nungi anentsüba anema parnoki lungkak ait.

Home Minister Amit Shah-i Lammual (Assam Rifles ground) nung lokti sentong ka nung adentsü aodang state PCC aser

Congress kongsang balala nungi züingsemtemi wako tanak aser tezülubatam amer lungkak ait.

Parnokisa Rahul Gandhi nem ochi obendang agüjang ta ayimten. BJP-i shishilembar Adani kumzüka ayutsü atema Rahul dak tenük yoka mapa inyaker ta Congress züingsemtemi aitsü.

"Rahul Gandhi-i teti backward classes atema noktaker saka pai OBC anema inyaker ta aitsüba ya nübortem anisatsü atema dang

jembiba lir" ta parnokisa ashi.

BJP-i 'freedom of speech' alenbanga ayur aser Centre sorkari aibelen inyakbatem jungkai adoktsü tsübur, item onük nungi paitoktsü atema parnoki tanga mapa inyaker, ta Congress-isa ashi.

Amit Shah-i Honibarü Mizoram semdangdang Assam Rifles headquarters complex aser Laldenga Cultural Centre dena Rs. 2,414 crore alangba mapatongtem inyaksü lung azüingtsüogo.

Kohima nung Phom nunger Monyiü benjong mungogo



Phom Union Kohima (PUK) Honibarnü Monyiü benjong amungdang noksa ka yangi angur. (Kohima, April 01, 2023)

Kohima, Rongchii/April 02 (TYO): Phom Union Kohima (PUK) Honibarnü NBCC Convention Hall, Kohima nung Monyiü benjong mera keta mungogo, koba Phom Naga nunger asoshi benjong tulutiba lir.

Monyiü ya mongpu aser meyi tsüngta amungba benjongmung ka lir, koba alu nung metsü yoker Tsüngrem dang temoatsü meshia amunger.

Mongpu tembanga meyi tenzükba temaitsü iba benjongmung ya amunger. Monyiü benjong amungba sülen ang asür tanüla asülimai aor, ta Phom nungeri akhi mapang nungi amanga arur. Anungji Monyiü ya asür tanüla dang salem ashiba mapang ka lir. Iba benjong mapang adianutsür aser jala kibong kumer alirtem tushia aser anepalua amunger.

Iba benjongmung nung tesemdanger tongti ka ama adendang Independent MLA B. Bangtick Phom-i Phom nunger dang nübur ajungtsü asoshi kechi inyakdir lungjemer inyaktsü ayongzüka liasü.

Takum nung telungjem aser ajemalu lira Tsüngremi Phom nunger tali moatsütsü, ta pai ashi.

Yimtsü aser constituency nung ajemdaker telemsa madoktsü aser terenlok nung tejakleni aotsü asoshi Phom

nunger ama lungjema alitsü pai ajungshi.

"Telungjem nung alitsü aser takok anguba kin ka asütsü atema nükjidong ka südi aser kasa meimteptsü," ta pai ayongzüik.

1986 küm Phom Union Kohima tenzükdang Kohima nung kilen 100 dang tajemba liasü saka tangbo nütsüng kanga züina kumogo, ta pai ashi.

Iba benjongmung sentong nung salem o jembiba mapang Kohima Village Council chairman, Helievio Solo-i iba benjong ajanga kin ana tsüngta tesendaktep tali akangshitsü imlar, ta shia liasü.

Monyiü ya nüburtem tsüngta tesendaktep tali akangshiba benjong ka ama lir, anungji Kohima nung aliba Phom nunger aser Kohima Village tsüngta tesendaktep tali akangshitsü imlar, ta pai ashi.

Naga nunger ajak ka dang lir, aser tang tensa tia nung Naga nunger ya tali lungjemshitsü nüngdaker, ta ashi.

"Asenok ka kuma lungjemtsü nüngdaker aser tesempatep, tiazü, ochimashi, ashikülak aser tako chitepa Naga nunger tashi mait mekumdaktsütsüla aser telemsa madokdaktsütsüla," ta pai ashi.

Putu balala benshia aruba otsü aser yimsü-yimpong wazüka ayuba nung ajak

lungjemer shilem agitsü mapangji benjong mapang ya lir, ta Eastern Nagaland Peoples' Union Kohima (ENPUK) tir N. Toshi Chang-ia ashi.

Phom nunger asoshi Monyiü ya benjong tulutiba lir, kong kibong nung teburtemi kibong kumer aliba jala mesüra adianutsür dang temeim sayua sempet balala agütsür, anungji loktiliba nung Phom tsür jenjang sayur, ta pai ashi.

Kin ajunga tashi itshitsü asoshi tetsü-tebou nunger temi amshia aruba yimya tajungtem maneni amshitsü aser wazüka ayutsü pai Phom nunger ayongzüka liasü.

Benjongmung ya pelatepa mapang indokba kisung masü saka tongtipangtibaji asen tsüngta tesendaktep tali akangshiba ya lir, ta pai ashi.

"Telungjem ya tashi tulu lir aser ibaj ajanga asen takum aser lokti nung temelenshi tajung bener arutsür aser ibaji ajanga tayongzüka balala ajangteter," ta pai ashi.

Iba benjongmung nung Phom Students Union Kohima & Youth Department of Kohima Phom Baptist Church ajanga benjongmung maitsütem jilushi ka agi sayu, Bhumnyu Union Kohima & Phomla Hoichem Kohima Unit ajanga tetsü-tebou ken aten aser indigenous games asaya liasü.

NITI ajanga angati SEED training agütsü



Dimapur, Rongchii/April 02 (TYO): Corporate Social Responsibility Initiative nung shilem ka ama Nationalist Institute of Innovation & Technology (NITI) ajanga Marwari Patti Center nung Skill Enhancement & Employability Development (SEED) training angati agüja liasü.

Iba training ya taküm March ita tanabuba liasü, kong kaketshir 60 dak tema nem MS

Office, Tally & Personality Development for Employability training agüja liasü.

Nagaland nung zünger mapa mangur lanur lakh ka dak tema lir, aser item lanurtem ya timba application balala amshitsü timi angazüksü nüngdaker aser mapa angutsü asoshi soft skills nüngdaker, ta Rishav Sethi, Head of Center, NITI Dimapur Center ajanga ashi.

Maneni Class X aser XII

tatidang agütsür aliba kaketshir tajungtem nem Center ajanga April 15, 2023 anogo tashi scholarship shilem 50 tashi agütsütsü.

Iba sentong nung shilem agirtem ya timba Dimapur, Chumukedima aser Niuland nungi liasü.

Head of Center, Software Engineer, Rishav Sethi ajanga asemnü training agütsüba nung adener shia nem shilem agiba kulizüng kaketshir agüja liasü.

Dimapur nung nisung ka gari agi tsükset

Dimapur, Rongchii/April 02 (TYO): Dimapur Police ajanga sangdong ka nung ashiba agi, April 1, 2023 anepdang 3:30 ako meta arishi küm 28 nungi 30 tsüngta mejangjaba nisung (non-local tebur) ka Dimapur Toll Tax Burma Camp, Dimapur anasa mejangjaba gari agi tusker jena ao.

Iba nisungba ya tar süklep 5'3 shi liasü aser tula sentü tanen aser temerem temeyoktep, jean long pant sentü tanen, belt

sentü tanak aser slipper sentü temerem semer liasü.

Iba nisungba ya tekolak yiru aser lendong atalokba tesem nungsa asü. Ozüng agi melaba maparen ajak tembanga inyakba sülen tasümgang ya jangjatetsü aser PM examination atema District Hospital Dimapur indang morgue nung bener oa lir.

Iba tatalokba dak sendakba nung ken o ka benokogo, ta sangdong ajanga ashi.

JCI Dimapur Creators ajanga Blood Donation Camp ayongzüik



Dimapur, Rongchii/April 02 (TYO): JCIDimapur Creators janga April 2, 2023 nü District Hospital Dimapur nung Blood Donation Camp ka ayongzüik, ta HGF Meena Ajmera, Co-ordinator, Blood Donation Camp, JCI Dimapur Creators ajanga sangdong ka nung ashi.

Azü tenla agütsüba ya danga kecha masü saka Tsüngrem temoatsü lemsatepba lir, ta sangdong ajanga ashi.

Mozü kidang azü bendenba

maparen nung Dr Temsu-i anir doctor aser nurses temi yaritepa liasü. Iba sentong nung azü tenla agütsütsü asoshi yimti nungi nisung tejangja aika aru aser parnok nema kulizüng kaketshir agüja liasü.

Kasa sentong nung tepela temaitsü azü tenlar nem süngo jemdakja liasü.

Iba maparen nung NBCJ co-ordinator ya HGF Meena Ajmera, President Mridula Agarwal aser IPP Neeta Agarwal nungtertem liasü.

Nganching nung Changlehong Khel morung semzüik

Dimapur, Rongchii/April 02 (TYO): MLA Manpon Konyak C ajanga April 1, 2023 nü Nganching yimdak Changlehong Khel morung semzüikja liasü.

Iba sentong nung jembidang morung takok ngua renemtetba atema MLA Manpon Konyak-i tepela lemsatep aser yimdakdir dang anepalua amshitsü ayongzüka liasü.

Pai Aboi subdivision aser talisa Nganching nung aliba nüburtem dang tarutsü nunga terenlok maparen inyakdang sorkar den amalitep akatsü aser yariteptsü ajungshia liasü.

Sentong nung ADC Phuleshe K Yephthomi, NCS ajanga lokti ayongzüik aser akhi mapang yimtsüng nung tongtipang telemtetbatem morung nung agiba bilemteta jembia liasü.

Iba sentong nung Awan N Konyak, Ex-candidate; Ashong, Convener, Construction Committee aser H Ngami, VDA Secretary nunger temia o tatsütsü jembia liasü aser Phuhton-i tarur pela agizükba o jembia liasü.

Iba sentong nung ketdangsur, nübur lenirtem aser NGOs nungia longso-longsoa dena liasü.

Beshang Chang-i District Hospital Mon semdang

Dimapur, Rongchii/April 02 (TYO): Minister, PWD (Housing & Mechanical Engineering), P. Beshang Chang-i April 1, 2023 nü District Hospital Tuensang semdanga liasü.

Pai iba District Hospital mezüngbuba semdangba mapang yangji ki o jen aser facility balala asadanga liasü aser doctor o nurse tem den sensaksem kaa liasü.

Tuensang nung aliba nüburtem asoshi doctor aser nurse temi jenjang tulu aketba service agütsüba asoshi pai pelaba lemsatepa liasü aser doctor tem memeleni transfer arutsü kanga nüngdakba ajiteta department den tekeraba nung jembitsü, ta shia liasü.

Minister-i mozki nung shirangertema semdanga liasü, aser pa meina pa kinungtsü aser party worker tem arua liasü.

[7:01 pm, 02/04/2023] Jungshi Tyy: Nganching nung Changlehong Khel morung semzüik

Dimapur, Rongchii/April 02 (TYO): MLA Manpon Konyak C ajanga April 1, 2023 nü Nganching

yimdak Changlehong Khel morung semzüikja liasü.

Iba sentong nung jembidang morung takok ngua renemtetba atema MLA Manpon Konyak-i tepela lemsatep aser yimdakdir dang anepalua amshitsü ayongzüka liasü.

Pai Aboi subdivision aser talisa Nganching nung aliba nüburtem dang tarutsü nunga terenlok maparen inyakdang sorkar den amalitep akatsü aser yariteptsü ajungshia liasü.

Sentong nung ADC Phuleshe K Yephthomi, NCS ajanga lokti ayongzüik aser akhi mapang yimtsüng nung tongtipang telemtetbatem morung nung agiba bilemteta jembia liasü.

Iba sentong nung Awan N Konyak, Ex-candidate; Ashong, Convener, Construction Committee aser H Ngami, VDA Secretary nunger temia o tatsütsü jembia liasü aser Phuhton-i tarur pela agizükba o jembia liasü.

Iba sentong nung ketdangsur, nübur lenirtem aser NGOs nungia longso-longsoa dena liasü.



April 02, 2023 nü Bihar state yimtiba, Patna nung aliba Arogo ka nung Khristantem Palm Sunday tekülem sentong nung adenba noksa nung angur.

Tzüyim nung tzu metre 1.1 tali ajanga Maharashtra nung lendong ataloktsü

Mumbai, Rongchii/April 02 (Agencies): 2023

Intergovernmental Panel on Climate Change (IPCC) report ajanga alima tzu-mopung dak sendakba lendong tulu ataloktsü asadangtetogo; global warming ajanga tzu yim nung tzu metre 1.1 tali kümra Maharashtra state nunga tzu yimkümlen alirtemi lendong tulu ajurutsüa akok, ta mongintemi metetdaksü.

Maharashtra state nung tzu yimkümlen kilomter 720 talang lir (Gujarat den arrtsüa aliba Palghar nungi Goa den arrtsü aliba Sindhudurg tashi), aser Arabian tzu yim nung tzu level ji metre 1.1 (feet 3.7) agi teimba kümra tzu yimkümlen alirtemi lendong tulu ajurutsüa akok, ta Indian School of Business nung Research Director, Dr. Anjal Prakash-i metetdaksü.

Pa den mongintemi Intergovernmental Panel on Climate Change (IPCC) 2023 indang report trok nungi report ana nung Coordinating Lead

Author aser Lead Author den yaritepa liasü.

Dr. Prakash-i, alima tatsükba akümba ajanga Arabian tzu yim nung tzu level metre 1.1 agi teimba kümra state nung tzu yimkümlen aliba district tem-Palghar, Mumbai, Thane, Raigad, Ratnagiri aser Sindhudurg kübok yimtsüng noklang aika nung tzu metsüng lendong ataloktsü, ta tekümdangtsü osang metetdaksüogo.

"Maharashtra nung temperatures teimba akümtsü aser tali atsükba ajanga health tsütsü timtem tulu adoktsü. Aluyimba, industries aser kibongtem nung tzu agi kanga anüngtsü, kechiyong state nung tzu atema talisa tzu nguluruwa mongpu dak metaloker. Tzu metsüng lendong kanga bulua ataloktsü, aluyimba tsütsü mejungi kongshitsü aser temperature-tzu nguluru aruba yimya melenshiba ajanga chiyungtsü agi anüngtsü," ta Dr. Prakash-i metetdaksü.

Paisa, "Alima tatsükba

akümba ajanga tesüiba küm 175 tsüngda molutzü (oceans) 0.8 degrees Celsius tashi talem kümogo. Molutzü talem akümba ajanga frequency teimba akümer aser yipru mopung tesashiba kümdaktsü," ta ashi.

Indian Institute of Tropical Meteorology (IITM), Pune indang study ajanga, tzu yimkümlen aliba tesemtem nung yipru mopung lendong atalokba ya tamalen dang nungi tang agi teimba kümogo, ta metetdaksü.

Tsüngsang mopung yimya melenshiba ajanga tarutsü nung Arabian tzu yim nung tzu nguluruwa mongpu matongdang aser iba mongpu süir külen yipru mopung tesashi ajanga state nung tzu yimkümlen alirtem kanga mejungi kongshitsü aser ibaji ajanga India nung crore 40 kongshitsü, ta Association for Scientific & Academic Research (ASAR) nungi mongintemia metetdaksüogo.

Bhutan Chubai tanü nungi tenzuka anogo asemnü India semdang

New Delhi, April 02 (Agencies): Bhutan Chuba,

Jigme Khesar Namgyel Wangchuck-i April 3 nungi April 5 tashi India semdangtsü; India Tir, Droupadi Murmu-i jaokba sülen pai linük semdang, ta sorkari metetdaksü.

Pa den külemi Bhutan foreign minister aser tongti ketdangsertem arutsü aser parnoki Tir Murmu aser Ato

kilonser, Narendra Modi den senden amentsü.

India External Affairs Minister, S Jaishankar den tongti ketdangsertemia Bhutan Chuba ajurua senden amentsü.

MEA-i sangdong ka ajanga, "Pai semdangba ajanga linük anati lenla balala nung amalitepa inyakba jenjang repringshitsü aser rongsenketsüng aser terenlok tsütsü partnership tashi

itshitsü atema maangka angutsü," ta metetdaksü.

"India ya Bhutan atema shishilembaba partner temaba lir aser Bhutan nung tongti invest asüba linükji India lir. 2021 küm November ita nung India-i Bhutan den tesendaktep aser shishilembaba transit atema lenmang tasen tenet lapoktsü maparen renema liasü," ta ketdangsertemi metetdaksü.



April 02, 2023 nü Jaipur nung doctor temi par chirnurtem anir Rajasthan's Right to Health bill anema longkak aيتدang tangokba noksa nung angur.

Tanü Rahul Gandhi-i Surat court obendang anema ken o benoktsü

New Delhi/Surat, April 02 (Agencies):

Hombarnü Congress lenir, Rahul Gandhi Gujarat state nung aliba Surat yimtii oa pa anema agütsüba obendang anema sessions court ka nung temepishiba ken o benoktsü, ta Amongnü pa atema lawyer kati metetdaksü.

2019 küm tenüng menüksüba ken o ka nung March 23, 2023 nü Court kati pa aija küm ana tepuokdak ayutsü obendang agütsüba sülen pa Lok Sabha MP nungi anentsüogo.

"Rahul Gandhi Surat nung aliba sessions court-i aotsü aser nikongdang 3:00 ako meta temepishiba ken o benoktsü," ta pa atema lawyer, Kirit Panwala-i metetdaksü.

2019 küm Karnataka nung

election nüboyimba mapang Rahul Gandhi-i, kechiba auer ajak tenüng nung 'Modi' keta lir, ta jembiba atema pa anema tenüng menüksüba ken o benoka liasü aser March 23, 2023 nü Surat nung Chief Judicial Magistrate, HH Varma-i iba ken o nung pa aitsü aser küm 2 tepuokdak ayutsü obendang agüja liasü.

Indian Penal Code (IPC) nung Arrla 499 aser 500 kübok court-i arrshi küm 52, Rahul Gandhi aija liasü. Court-isa pa nem bail agütsü aser temaba court ka nung temepishiba ken o benoktsü atema pa nem maangka agüja anogo 30 atema obendangji soita atatsü lemtet.

Court-i pa aitsüba sülen March 24 nü pa Lok Sabha MP nungi anentsüogo.

India nung ano nisung 3,824 dak Covid putet



April 02, 2023 nü New Delhi nung aliba Sarojni Nagar market nung nisung mesemi senzüba noksa nung angur. Tesüiba ghonda 24 tsüngda India nung ano nisung 3,824 dak coronavirus putetogo.

New Delhi, April 02 (Agencies):

India nung ano asentenshir coronavirus proktsür tsübuba mapang ka nung tesüiba ghonda 24 nunga nisung 3,824 dak coronavirus putetogo, aser iba ya tesüiba anogo 184 tsüngda anogo ka kija nung nisung teimtiba dak covid putetba lir.

Tang linük nung coronavirus agi teshirangdakpur 18,389 kümogo aser anogo shia positive putetba shilem 2.87 kümogo.

Union health ministry-i ashiba agi, tang tashi nung India nung nisung 4,47,22,605 dak iba tashidak putetogo aser iba tashidak agi asür ajak senteper 5,30,881 jungogo.

Tesüiba ghonda 24 nunga linük nung coronavirus agi shiranger nisung pongu asü.

Tang linük nung coronavirus agi tamajungtiba kongshiba state anaji Kerala o Maharashtra na lir; Kerala nung coronavirus agi teshirangdakpur 4,953 lir aser Maharashtra nung teshirangdakpur 3,324 lir.

Gujarat nunga coronavirus agi teshirangdakpur 2,294 lir, Karnataka nung 1,259, Delhi nung 1,216 aser Himachal Pradesh nung teshirangdakpur 1,196 lir.

Tang linük nung H3N2 influenza agi kanga bulua shirangtepba mapang nung coronavirus-a kanga prokdar.

West Bengal nung BJP lenir ka kaset

Bardhaman (West Bengal), April 02 (Agencies):

Honibar aonung West Bengal nung Purba Bardhaman kübok Shaktigrah area nung mejangjaba nisung kari BJP lenir, Raju Jha kasetogo, ta police-i metetdaksü.

Police ketdangsertemi ashiba agi, BJP lenir Raju Jha ya Durgapur nungi shishilembar ka liasü ta jangjaogo. Pa den nisung kar Kolkata-i oa aliba mapang Shaktigarh area nung aliba dokan kima ka anasa mejangjaba nisung kari parnok amak.

"Gari nungji Raju Jha densema nisung asem liasü. Pa kechi kuli agi kasetar mejangja. Onoki iba tatalokba

bushisüngdangdar," ta Bardhaman SP, Kamnasis Sen-i metetdaksü.

Jha dak injang khaloktsüba sülen pa anasa aliba hospital kati anir ao saka pa süir ang hospital atong. Yirua alirtemji hospital ka nung treatment agidar.

Left Front sorkar mapang nung Jha-i ozüing alema Silpachal nung koila business inyak, ta pa nem tai tonglokja liasü.

Trinamool Congress-isa pa anema ken o aika benoka lir.

2021 küm December ita nung West Bengal assembly election jakdang pai BJP nung aden. Iba mapang nungji State BJP Tir, Dilip Ghosh-i pa party nung agizüka liasü.



TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 03, 2023

Kechi tashi azüng ?

A tangji, linük nung ato kilonser (prime minister) ya kechi tashi azüng (?) mesüra Chief minister-ba ya kechi tashi azüng (?) mesüra asen MLA-ba yaa kechi tashi azüng ta asübaji Arvind Kejriwal-i dang masü ajaki metetener aser aji metetnüa asüngdangba atema kecha tai mali. Ajisüaka, metetnüa asüngdangba ama linük nung ato kilonser Narendra Modi tazüngba jenjangji tejangja metetdaksütsü melen, ano meyiper metetnüa asüngdangba dangang senchi sen meyrirjang 25 achitsü obendang agütsüba kulijiang temetetnüsüka kümogo. Atangji, metetnerba dang ashi, linük nung ato kilonser mesüra chief minister mesüra MLA akümtsü asoshi kecha balaka tazüngba jenjang menüngdaker. Aji oda, gari anishitsü atemabo class VIII tashi azüngba nisung asütsüla ta telatet ka alitsüa akok saka linük nung tatar yimsüsür asütsü asoshibo tazüngba jenjang kecha lateta maka. Iba onük indang linük nung temzüng yanglurtem rongnung ken o ashishitepdang, Dr.Ambedka-i linük nung yimsüsür akümtsübaji tazünger dang agitsü ta latetra, iba jagi tazüngertem dang nungi shisatakaba, techiraba aser tajangshiba nisung aika nübo mamshitet takoksa angutsü ta ashiba agi, tamasayongi India nung yimsüsür akümtsü atema tazüngba jenjang balaka lateta meyutsü. Ibai talisa, India nung temaba aser teküpbokba jenjang nung alir ta kasa sensosangertem rongnunga telemsa lir. Aji oda, kasa linük nung kasa sensopur süaka karbo yimsüsür asütsü, karbo putir mapa inyaksü saka ano karbo sü shia dang alitsü aser karbo ki oker dang asütsü ta telemsa aliba sobaliba tamajung liasü. Iba jagi, temaba jenjang nung alir, kin tulutemi teküpbok jenjang nung alirtem dak tesemba agi tekongshia mekongshir, külemi mechiyonger aser mamener, anungji temaba jenjang nung alir kin tulu nungi adokertemi dang kaketshisatsüjia angur saka teküpbok jenjang nung alirtem asoshibo kaketshisatsü angutsübaji tadongtsüla masü mapa ka liasü. Iba ama tia ka nung linük temzüng yanglu aser tanü tashi kasa jenjang nungji lir. Iba jagiang teküpbok jenjang nung alir, shirnok tokolokbo tajung aser nütsüng nüboa lir saka makamaitba agi kaketshidaki mouteter, parnok dak kecha tazüng temetetba meliaka election-iteter aser yimsüsür kümetter. Atangji, tanübo temzüng ozüng nung lateta meliaka nübortem madak yimsü asütsü, ozüng latettsü aser terenlok sentong tapu balala yanglutsü asoshi MLA mesüra MP akümtsübaji kecha memetet aser mazüngmashiba nisungbo putu den meputeptsü. Küm 70 jakdang, Amdedkar-i ashibajia shitak liasü saka tanü putu nungbo tokolok aser shisatsü liaka tazüngtemetetba melira tepu küleni shi mengozüktetba amato kangshitsü aser nübortem asoshi takoksa tulu asütsü. Aji oda, nübortem madak yimsü asütsübaji shiba südir sang takar asüba mesüra tokolok chiraba kisüng agi masü saka shiametetba aser jembishinü nung nübortem nümadangteta asütsüla aser temulung nung bilemba tebang agi jembiteta aser tebang agi jembitetbaji züluteta ta alima tzü mopong aser anü ita petinutem tia indang tashi shisadangtsü aser metettsü akokba senso asütsü tim. Asen lima nung item ama zünga shia metetter yimsüsür tajung aika lir saka ano tenüng agidang zünga shia metet ashi, nübortem asoshi inyaksü bilemba kecha maket, tokolok tazüng aser shisa makaba purtema aika lir. Ajisüaka, yimsüsürji shiba südir sang, pa mesüra laji pasasa mesüra lasasa shimtet masü nübortemi shimtet, anungji nübortem dak alang yimsüsür moago ta dang bilema agidi. Tanü linük nung PM dak dang masü saka tanga kilonser Smriti Irani indang tazüngba jenjang nunga temulung melemi ken o adokba asenoki angashiogo, Kasaji, Nagaland nunga Chief minister indang tazüngba jenjang ashishiba asenoki angashiogo. Atangji, kecha mazüngyonga PM aser CM kümettsü, aji kecha masü. Ajisüaka, tebilemtsüji election nung tokteptsü atema tenüng agütsüdang azüngashia agütsüba ama, pei taküm indang temetettsütem affidavit nung azüngashia agütsüba temetettsü kar danga tai süra, ajibo 'Criminal Offence' asütsü ta 'Indian Penal Code' nung shia lir. Iba jagi, kechi tashi azüng ta asübaji masü saka pai pa azüngba jenjang azüngashia metetdaksübaji shitak asü tai (?) ta asübajiang tongtibangba kümogo.

OLEMSABANG

PALM SUNDAY OSANG : (PALM SUNDAY NUNG GADO-A TETOSHI ANGU!

~ Mr.I.Ben Jamir, Missionary Atlarge, Aoyim Chemoukidema

(Yashi adok nungi...)

2. Telok tulu jagi Hosanna, Hosanna, ta ayimtena Yisu Khrista nem tetushi tulu agüja anitakba nungjia gado chanujia tushisem. Iba anogo nung ya Yisu aser gado chanu tenaprongla kecha tebandang melie telok ajaki kesa jenjang nung tenüngsang aser tetushi külemi dang agütsü. Asenoki Kodang Palm Sunday onük jembiba angashir aikati gado chanui shilem agiba ya tongtipang ka küma mejembir, Saka Palm Sunday osang (Sermon) nung gado chanue shilem agiba shisadangdir Tanela lesson agitsü tulu lir. Gado ya meimchiri kanga tongtipangsa sabua mamshir aser metetshir, la tereprangtsü sor mejungi liaka la ya ajemaluba shiruru ka lir. Kodang Palm Sunday jelushi nung ya Yisu Khrista la dak mendaktsüba shisadangdir, la techanuii ni Pa mang metizüktetsü ta kecha nongnanga melii la timtem aremzüka aser tashi anga Yisuji mendaktsütsü molunga liasü ta angateter. Kodang asenoki junga shisadangdir Yisu nem sü aser süngo tutem lemtsüba ajak nungji la-ang jajatsüsa aküm, aser ano telok tului ayimtena Yisu nem tenüngsang aser tetushi agüja meinba ajak nungji la-a tensema liasü. Asenok meimchir rongnung tebensa aser tebandang (Categories) amshir, saka Tsüngrem tsüngdangbo nisung ajak kasa Pa mesükba nung yanglua lir, anungji kodang nisung ka taküm nung Yisu Khrista Kibur kümdaktsüdir mesüra mendaktsüdir, Yisu tebur ajungba, Pa tashi ain aser sentsüwangshi ajakji Yisu Khrista akaba taküm ka dak jungkai adoka reprangteter.

Nisungbaji koba amala jenjang ka nung lidir liaka gado chanu dak Yisu mena ali tashi la khonang aser tetushi anguba amaji jenjang kasa nungji züngshir. Kibuba dak amangang, aji süra na alima nung taso shia alitsü ta T.Ken 37:3. nungji shia lir. Yisu Khrista asen dak lira tangar shinga makaba sempet talila ka asen kar ta metetdi. Yisu Khrista akar taküm kaji ajaki meraketa reprangtsü aser akümtsübutsü. Aseni jembiba Tsüngrem O aser Sarasademji jentipur asoshi nisung mulungjang nung temelenshi adoktaktsüba Tsüngrem O aser sarasadem asütsü. Palm Sunday ajanga amangertem taküm nung tangazüktsü Tanela lesson aika tensema lir. Teloki Hosanna Hosanna ta ayimtena Yisu tushirtemi künü anogobu Pa Kangki nung angenlokang ta ayimtenba Yohan 19:6 nungji shia angur. Asenok arogoburtemi tekülem mapang nung shilem agir kari Hallelujah ta ashidang, Praise the Lord, ta langzür aser God is Good ta ashidang, All the time ta langzür ,item tamangertem kesa agisa Election aser tanga mapang nungbo sen angutsü mechi nung Pa Kangki nung angenlokang ta ayimtenba mesüka Tsüngrem atalartem akümer. Asen taküm nung gado chanu dak Yisu mena ali

tashi la tushia liasü aser dangari lemtsüba sü aser asang tu madak jajaba ama dangar nungi anguba temoatsü jenti ngua item

temoatsü nung alitsü. Asenok tamanger shir dak Yisu Khrista kadir, parnok jagi Pa kangki nung angenlokang ta ayimtenba telok nungji kodanga matentsü. Palm Sunday ajanga gado chanu dak Yisu amentsüsa la temsüa akümba ama asen taküm nung teti asoshi Yisu Khrista mendaktsüsa temsüa aliba taküm ka asütsa renema lidi ta iba Tsüngrem O ajanga ayongzüker. Tazüngertem ajak

Tsüngremi moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

KLBC-i Lotha nungger MLA tem atema tenüngsang agütsüba sentong agi



April 02, 2023 nü Kohima nung Kohima Lotha Baptist Church (KLBC) Arogo Conference hall nung KLBC-i Lotha nungger MLA tem atema tenüngsang agütsüba sentong ka ayongzüka agiba sülen tangokba noksa nung angur.

Kohima, Rongchii/April 02 (TYO): Amongnü Kohima nung Kohima Lotha Baptist Church (KLBC)-i par Arogo indang Conference hall nung Lotha nungger MLA tem atema tenüngsang agütsüba sentong ka ayongzüka agiogo.

Iba sentong nung jembidang Deputy Chief Minister Home, Y Patton-i Lotha Baptist Church Kohima-i iba sentong ayongzüka atema pelaba

metetdaksü. Paise yimtenren party balala dang taoba assembly election mapang nung metokmeperi balala inyakba atema tai toktepa amadoktsü aser state nung yimjung den terenlok alitsü atema longjemer inyaktsü ayongzüka liasü.

Patton-isa, kodang Arogo tashi itta lidir sorkar-a tashi itta alitsü, anungji talisa Nagaland ama Khristan state ka nung

Arogo aser sorkar napronglai amalitepa inyaktsüla, ta ashi.

Kasa sentong nung MLA tem- Mhathung Yanthan Advisor Agriculture, Mhonbemo Humtsoe MLA aser Achumbemo Kikon nungeria jembia liasü.

Iba sentong ya KLBC pastor, Mhonchumo leniba nung agi aser KLBC nung senior pastor, Rev. Dr. Benry Lotha-i tayongzüka o jembia liasü.

Kochi nung Palm Sunday nü Khristan meyirjang aikati shilem agi



April 02, 2023 nü Varappuzha nung tongti putir, Joseph Kalathiparambil leniba nung Khristantemi Palm Sunday procession agidang tangokba noksa nung angur.

Kochi (Kerala), Rongchii/April 02 (Agencies): Palm Sunday anogomong nung Kerala kübok Kochi yimti nunga denominations balala nungi Khristan meyirjang aikati asang tou amer yimdong süa jajaba nung shilem agiba den külemi sarasadem aser Tasen Lai nung Yisu Khrista Yirusalem yimtii aiba bilemteta mongogo.

Varappuzha nung aliba Latin Arogo nung tongti putir, Joseph Kalathiparambil leniba nung St. Francis Cathedral nung

tekülem sentong agi. Asang tou amer yimdong süa jajaa Hosanna ken tena senzüba sülen tekülem agia iba sentong tembanga liasü.

Tekülem sentong nung jembidang Joseph-i, "Easter aser Lent mapang ya Yisu den aintsü atema maangka mongpu lir, kechiyong iba mapang nung temeshiba aser tejungnüba kishitem asenok atema lapoktsür," ta ashi.

Kochi yimti tezülen St. Thomas Mount nunga Syro-

Malabar Arogo nunga tongti putir, Alencherry leniba nung tekülem sentong agi aser Palm Sunday procession agia liasü.

Alencherry-i, Palm Sunday ajanga tongmelang nisungtemi Yisuji David nungi jakzüka aser Messiah lir, ta sangdongba asenok nem bilemtetdaksür, ta ashi.

Khrista sülen anidakertem ama Palm Sunday ajanga asenok dang telongjem nung alitsü aser meimchir tenzüksü nenshia metetdaksür, ta paise ashi.

Michael W. Smith aser Andrea Bocelli nati film ka atema longjem

April 02, 2023: Osangtajung kentener, Michael W Smith-i nungtugu kentener, Andrea Bocelli den Khristan film tasen ka atema longjem; iba film nungji tenapronglai Khrista dak tamang akaba indang kuli asüba den külemi osangtajung ken atener.

"The Journey: A Music Special from Andrea Bocelli," film ya Christian broadcasting network TBN-i produce asü aser Palm Sunday (April 2) nungi Easter Sunday (April 9)

tashi theatres nung sayutsü.

Michael W Smith-i, "Nisung aika tejashi nung lir. Tesüiba küm ana tsüngda (wara mapang) nisungtem azüngmeyaka liasü aser tang parnoki tesem tai nung ochi bushitsü meranger. Tanü alima atema telangzübaji Yisu Khrista ajanga dang angutsü," ta ashi.

"The Journey" film nung Bocelli aser Smith na den külemi nungtugu kentener-tem-2CELLOS, Tori Kelly, Clara

Barbier Serrano, Tauren Wells, TAYA, 40 Fingers aser Katherine Jenkins nungeri shilem agir.

"Ni tasü liasü saka kü Kümtetdakba aser kü Yisu ajanga ni shia aru. Ibaji ajanga ni taküm lidaktsür," ta 'Draw Me Close to You' ken atensangi metetdaksü.

"Na alimai aruba ya aibelen ka ajanga aruba masü. Nai iba film reprangba ajanga langkabo angazüksü ni sarasademtsür," ta pai ashi.

ANOGO ABEN TSÜNGREM DEN

Temulung meranga aküm T.Ken 95:7-11

Tanü azüngba nungji tekümdangtsü ashiba o ka angur. "Tanü, o nenoki Pa ola angalasang: Nenok temulung temerang" (t.7,8). Israel kini ibai arem nung inyak. Ejiip nung Kanan tashi nung parnoki Tsüngrem mapa angu. Aser meyipa parnoki kechi inyak? Parnok mulungjang meranga kümdaktsü.

Asenoki asen temulungjang koda merangdaksür? Ibai inyakyim ka lir aser agi Tsüngrem mapa nung ashishia aser Pa o magizükba nungi meilungi meilungi adokdaksür. Israel nungeri Pai aniba aser Pai mesüba nung nemnemshinem asü. Parnoki Tsüngrem O angashi aser asaa tashi mangai toktsü. Iba dangji Tsüngrem atitangba ta ajar. "Koba mapang nung ner tsüraburi ni atidang, tendang aser kü mapa angu. Iba putu den ni küm lir jashia liasü" (t.9).

Kodang nai mapa ngur pelatsü melen nemnemshishidir, kodang nai Pa o angashir aser asaa tashi mangalir- nai Tsüngrem atidanger. Ibai tila tanur kati tebu aser tetsü azüoktsü merangba ama lir. Kodang nai ne mulung merangdir, Tsüngremi ne taküm asoshi yuja aliba sendoker. Israel nungeri sayatenyatem angu. Parnoki osangji angashi. Parnok anogo shia mesü. Saka küm 40 tsüngda nung, Tejenba putu ajak asü. Parnoki parnok senmang ajungabo magitet.

Temulung temerang nokdangtsü nai kechi inyaktsüla? Temulung meyipang. Tsüngrem O angang aser agi ajemalua agizükang. Tsüngrem mapa ajia liang aser agi tenüng sanga agizükang. Nemnemba aser tashi mangaba anenang. Kibubaji külemang aser Pa tsüngdang ne mulungjang anüka liang.

Kodang nai Tsüngrem aser Pa temoatsütem teronem ama agidir, nai Pa tenüng asangba aser tashi angaba ajema asütsü. Item tekümdangtsü tekongtem temulung nung yuang: Ne mulungjang Tsüngremer O nem lapokjang aser Pa dang tashi angang.

Rose Heights Arogo nung pastor Anderson süogo



Pastor, Doug Anderson

Tyler (Texas), April 02 (Agencies): Texas kübok Tyler yimti nung aliba Rose Heights Arogo nung pastor, Doug Anderson Honibar nikongdang alima nungi pilaogo, ta par Arogoi sangdong ka ajanga metetdaksü.

Doug Anderson iba Arogo nung küm aika pastor inyakba sülen taküm ang anisüngzüka liasü. Rose Heights Arogo nung pa küm 37 tashi inyaka aruba sülen taküm January ita nung ang pa anisüngzüka liasü.

January ita nung pa Kibuba tenzüka wadang nungi anisüngzüka sentong nung jembidang Congressman, Nathaniel Moran-i Anderson nem tetushi agüja, "Yisu Khrista tesayuba sülen anidakba atema ni nü nem iba wako aser

certificate agütsür. Doug aser Gina na nem tenüngsang agütsür," ta metetdakja liasü.

Rose Heights Arogo indang Facebook post ajanga Pastor Allen Townsend-i, "Onoki tejashi nung ozü pastor, lenir aser tembar asüba osang sangdonger. Pastor Doug-i alizüng tonga asema sülen tanü nikongdang (April 1) par kibong züngsem ajak lia pa tesünep nung amozüka ogo. Gina, Reece, Rina, Michael aser Anderson kibong atema sarasademtsütsü onoki mepishir," ta metetdaksü.

"Nenoki Anderson'er kibong atema maneni sarasademtsüba, nungita yariba aser temeim sayuba atema pelar," ta Arogoi kasa sangdong ajanga ni nü nem iba wako aser metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Pojen

(n) po tejen, pei putu süir aliba nisung
* Tatar yimsürtema pei putu mapang süirbo po tejen ama **pojen** akümer.

Pokchi

(v) o sapoka ashiba, miima meyui ashiba (frankness)
* **Pokchi** mashirtem mulung metettsü kanga tasak.

OLONG PAITEP # 6476

15-grid crossword puzzle with numbers 1-16 indicating starting positions.

TIPLÉN

- 2. Auonungchiyongsüasenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A___g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S___k
- 14. T___r

OLONG PAITEP # 6475 TELANGZÜBA


TIPLÉN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tassen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

Agüja aliba noksa nung putepa aliba bushiang



Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

BJP MLA aikati Congress nung adentsü: Congress lennir RP Sharma

Guwahati, April 2, 2023 (Agencies): Assam nung BJP MLA pezü nungi trok shi kati yakta Congress nung adentsü ta Congress lennir RP Sharma-ashi.

Deobarnü Gohpur nung osangbener den jembidang BJP nung Congress indang "secret agents" lir ta pai ashi.

BJP sorkari policy tamajungtem yanglur aser nübortem melena Adani group sapur. Tawa petrol jenjang atuba ajanga BJP-i kecha masüba nübortem timtemdaksütsü sayur.

Modi'er sorkari tax menokertem dang nungi sen meshir aser iba senji Adani nem agütsür, ta Sharma-isa

metetdaksü. "Rahul Gandhi-i tawa Prime Minister Modi dang Adani'er teloki sorkar den tesentaktep aliba aser ashishitep aketba mapatongtem atema asüngdangogo.

Parliament nung Rahul-i ashiba ajakji shitak aser Congress-i maneni yimtsüng aser kinük ajaklen item t a s ü n g d a n g b a t e m asüngdangtsü.

Modi-i item tasüngdangbatem indang telangzüba agütsüsüla" ta Sharma-isa ashi.

Tang alima nung crude oil jenjang ajema lir saka Modi'er sorkari petrol jenjang atur aser iba ya nübortem dang nungi sen auyazükba lir. Modi'er sorkari

company kibur kar ajangzükdaksütsü atema jenjang atur. Congress ya democratic party ka lir aser BJP ama masü, ta paisa shisem.

Gohpur constituency election nung Congress-i takok angutsü anungji nübortemi party pusemstsü ayongzükter, ta Sharma-isa mepishia metetdaksü.

"BJP ya Atal Bihari Vajpayee-i aniba party tu masü kümogo aser democratic tangatetba samaogo. Nübortemi BJP sorkar indang policy tem anema ola adoktsüla aser pei temetentem atema raratsüla" ta Congress lennir RP Sharma-isa ashi.

Taoba president-i Kaziranga semdangdang sen endokba bushisüngdang

Guwahati, April 2, 2023 (Agencies): February 2022 nung taoba president Ram Nath Kovind-i Kaziranga semdangdang senotsü tim mesüi amshiba bushisüngdang tuyuogo.

Kovind aser par kibongi Kaziranga National Park semdangdang tiger conservation aser tanga mapatongtem kübok senotsü agizük amshiba atema Assam sorkari additional chief secretary dang bushisüngdang asütsü tetuyuba agütsü.

"Additional chief

secretary Ravi Shankar Prasad dang bushisüngdang asütsü tetuyuba agütsüogo" ta Assam environment & forest minister Chandra Mohan Patowary-i ashi.

"Onoki Prasad dang tatalokba ajunga bushisüngdangtsü shiogo. Tang pai tiger projects aser tanga conservation efforts indang senotsü amshiba reprangdangdar.

Taoba President-i Kaziranga National Park semdangdang senotsü tim mesüi amshiba bushidar" ta Patowary-i metetdaksü.

Iba mapang Kaziranga National Park nung tiger conservation indang corpus fund nungi Rs 1.1 crore tashi tim mesüi amshi ta RTI telangzüba ka ajanga nguogo.

Tiger conservation atema lemezüksüba sen agi taoba President Ram Nath Kovind-i semdangdang chiyungtsü, tents, carpets aser mementoos atema amshi ta RTI telangzüba nungsa shia lir.

Iba RTI ya Assam nung RTI activist Rohit Choudhury-i agütsüba liasü.

Manipur nung AR-i telungpur 2 apu; ka khaset

Imphal, April 2, 2023 (Agencies): HQ IGAR (South) indang Churachandpur Battalion sepaitemi People Liberation Army (PLA) telungpur ka apu.

Iba nisung ya PLA captain Soibam Ibomcha ta jangjaogo aser Assam Rifles sepaitemi apuba sülen Churachandpur Police ket nung agütsüogo.

Ano, HQ IGAR (South) indang Phundrei Battalion sepaitemi Waikong, Kakching District nung KYKL telungpur ka apu.

Kanglei Yawol Kunna Lup

(KYKL) telungpur kati ozüng alema mapa inyaker ta osang tejangja angazükba sülen Assam Rifles sepaitemi mita aodang KYKL telungpurji apu.

Iba nisung ya Hiyanglam Police Station ket nung agütsüogo.

Ano, Manipur kübok Phezawl district nung Assam Rifles den khatepdang Kuki telungpur ka khaset.

Honibarnü Suwangphumun yimtsüng nung telungpur khaset aser pa ket nungi AK 47 rifle ka, magazine ka, 27 live rounds aser taitüsü aketba kulikakettem

ngutetogo ta ketdangsur kati ashi.

Assam Rifles sepaitemi Suwangphumun yimtsüng anasa patrolling senzüdang Kuki telungpurtemi injang khaloktsü ta osang angazükter.

Idangji sepaitemi meyiper khatepdang Kuki telungpur ka khaset saka tanüngba telungpurtemi aremleni jena oadok.

Tasüsangji Doulangthang Simte (Thangboi Simte) ta jangjaogo aser pa ya Churachandpur district kübok Sangkhimum nung liasü.



University of Science and Technology Meghalaya (USTM) nung Department of Social Work-i World Social Work Day ayonga amongdang social worker Ruby Ahluwalia nem Social Work Excellence Award agütsüba angur. Ruby ya Sanjeevani... Life Beyond Cancer founder lir aser la ya cancer tashidak nungi jenbur ka lir aser integrated cancer care management mapa inyaker. Iba sentong nung USTM Vice Chancellor Prof GD Sharma-i Ruby Ahluwalia nem sempet agütsü aser Mahbulul Hoque, Chancellor, USTM, Dr RK Sharma, Advisor, USTM aser Dr Joseph Riameifrom Tata Institute of Social Sciences, Guwahati nungertem aden.

US nung yipru tesashi ajanga nisung 26 süogo



Washington, Rongchii/April 02 (Agencies): United States kübok South aser Midwest nung tornado agi jila aser yimti aika nung kongshia nisung tajemba agi 26 takum samaogo.

Item yipru yagi state aika nung kongshia nisung aliba ki raksatsü aser ano nisung meyrirjang aika power raksatsü.

Washington Post ajanga ashiba agi, tornado 60 dak tema aruba osang lir.

Iba yipru tesashi ajanga Arkansas, Tennessee, Illinois, Indiana, Alabama aser Mississippi state tem nung asü-ama ajurua liasü.

Yipru kati Arkansas yimtiba Little Rock anüdoklen mile 100 pilar Wynne jila nung kongshia liasü.

Ashley Macmillan-i ashiba agi, la kinungbo aser tanurtem metzü meshiba tesem ka nung jenoka lia tornado ka ajanga ao aser iba mapang parnok sarasadema aser kati ka den tatem salem shitepa liasü, kechiaser parnok asütsü ta bilema liasü.

Süngdong ka laoa parnok ki kanga sashia raksatsü saka

parnokbo meyiru.

"Ki anokshitsüba onoki metetogo, ola tulu adoka osettsüset tsükba onoki angashiogo. Aser iba sülen süngjema akum," ta lai ashi.

Wynne High School nung tesayur Lisa Worden-i ashiba agi, tanurtem kidangi kera yoktsü kanga tongtipang liasü.

"Onok nikongdang 1:30 ako nung senshi, koba ozü superintendent nungi Tsüngrem temoatsü ka liasü, kechiaser yamaji meinyak asübo tanurtem bus tem nung aser tesayur tem yangji lila. Aser ibajiang lendong tuluba liasü," ta lai osangbener dang ashi.

Hokulbarnü Arkansas nung Governor Sarah Huckabee Sanders-i state of emergency sangdonga liasü, anungji national guard temi maparen balala nung yaritep.

Lai Tir Joe Biden den iba tensa indang jembiogo aser pai federal teyari agütsütsü nangzük, ta lai ashi.

Hokulbarnü yipru yagi Belvidere, Illinois state nung concert agütsüba tesem ka indang kilem tsüka nisung ka asü

aser 28 yirua liasü.

Yipru ya maneni anüdokleni aor, aser state aika nung nisung meyrirjang aika power maka timtema lir.

Yipru yagi Virginia, Ohio aser Pennsylvania nung tamajungba kongshi, ta US PowerOutage website ajanga ashir.

Mississippi nung yipru tesashi ka ajanga nisung 26 takum samatsür hopta ka lir ano tornado balala ya arua liasü.

Taoba hopta Mississippi nung kongshiba tornado ya mile 59 tashi jaja aser ghonda ka ser minute ti tashi liasü, aser iba ama yipru ka mapang talangka aliba majangshidang. Iba yipru yagi nisung aliba ki 2,000 shi raksatsü, ta keddangsur temi ashir.

Tir Biden-i iba state ya Hokulbarnü semdanga asükhu lemsatepa liasü.

Tang tesüsa yipru agi asürtem ya Tennessee state nung nisung toku, anasa Arkansas nung nisung pezü aser Illinois nung nisung pezü liasü. Ano Indiana, Alabama aser Mississippi state tem nunga asü.

African linüktem nung Marburg virus prokshir

Washington, Rongchii/April 02 (Agencies): Marburg virus, koba agi nisung toku takum agiogo, iba virus ya African linüktem nung prokshia alima nung tebilemtsü akar.

Hemorrhagic fever poktetba ya Kie-Ntem province alema prokshia ogo, kong January ita mezüngbuba nisung asü aser west African linük nungdang economic capital Bata tongogo.

US Centers for Disease Control and Prevention (CDC) ajanga Guinea aser Tanzania leni aortem dang iba Marburg virus memenatsü kumdanga senzütsü ashir.

Iba tashidak prokshia aoba nokdangba nung yaritsü aoshi CDC ajanga keddangsurtem Africa-i yoker. Parnoki Guinea

aser Tanzania nung senzürtem dang tashidak alidak shiranga alirtem majurutsü aser healthcare facilities bushia maotsü aser item tesem nungi pilar hopta asem tashi temang nung timtem meteta alitsü ashi.

Saudi Arabia-ia par senso dang Guinea aser Tanzania leni maotsü tenokdangba agütsüogo. Oman-ia par sensotem iba African linük anati maotsü tenokdangba agüja lir.

Marburg virus yagi temang aronger, aiben azü ayimer aser temang shilem mapa meinyaki kumdaktsür. Ibai filovirus kibong nungi lir, kong Ebola densema lir, koba agi taoba mapang Africa nung nüburtem tsübodakja liasü.

WHO-i iba tashidak tesem aisü nung jatettsü tekumdangtsü

shiogo, koba anasa aliba Gabon aser Cameroon lenia prokshia aotsü akok ta ashir.

Marburg tashidak ya taoba mapanga Angola, Congo, Kenya, South Africa, Uganda aser Ghana linüktem nung pokteta liasü, ta WHO ajanga ashir.

Taoba hopta Tanzania nunga nisung pongu tashi Marburg agi asüba sangdonga liasü saka linük northwest tsütsü Uganda den arütsüa aliba Kagera region leni rapid response team yokba sülen iba tashidak prokshia aoba azüoka lir ta ashir.

Marburg virus ya Africa nung süngjang achiba lah nungi adok, ta temolung melemteti lir, kobai pathogen bena lir saka teshirangbo meshiranger.

Office of the CHUNGTIAYIMSEN VILLAGE COUNCIL

P.O. Mangkolemba
B.P.O. Chungtiayimsen
Dist. : Mokokchung, Nagaland

Tepela Lemsateper

Chungtiayimsen Yimdeni Wabong Subongmeren Hoki, shiba iba yimtsüng nung senso tajung ka lir, Pa Nagaland Empowerment of people through Economic Development (NEPED) nung Chairman Nagaland Governemnt-i shimba tenüng nung tepelaba lemsateper aser pa nem tenüngsang agütsür.

Ano tarutsü anogotem nung nüburtem asoshi tali takokba aser temoatsü nung anitsü onok teyimla tulu lir.

Pur
Purtemsü Kichu
Chairman
Chungtiayimsen Village Council

Chairman
Village Council
Chungtiayimsen

L. Bendang
L. Bendang Longchar
Secretary
Chungtiayimsen Village Council

Secretary
Chungtiayimsen Village Council

ALI TAYOKTSÜ LIR

Location : Behind Sovima Cricket Stadium
Any Size Available
CONTACT : 7629839960

Israel-i Syria kübok Homs province amak: Defence Ministry

Damascus, Rongchii/April 2 (Agencies): Israel-i Syria kübok Homs province nung outposts kar anüng ajak maka sepai pongu yirutsüogo, ta Syrian defence ministry-i metetdaksü.

Deobarnü anepdang Homs province amakba ya anogo ishika tsüngda Syria nung tesem balala tasembenbuba amakba lir aser Hokulbarnü tesem ka maka Iranian Revolutionary Guards military advisers ana tepsetba sülen anogo ana dang lir iba tesem makogo, ta Iranian semi-official Mehr news agency-i ashi.

Israel-i northwest Beirut len nungi anüng ajanga Homs kübok yimti kar nung outpost kar aser yimti tezülen tesem kar anepdang 00:35 ako nung maka liasü, ta Syria defence ministry-i metetdaksü.

Syrian air defences-i missile tem khaloktsüba lazüka missile karbo khadangogo, ta ministry-isa ashi. Syrian military source kati state media nung ashiba agi, item tesemtem amakba sülen kiojen kar raksaogo aser sepai pongu tashi yiruogo.

Iba ken o dak sendakba nung Israel military-i telangzüba kecha magütsü.

Western intelligence sources anati Reuters news agency dang ashiba agi, missile tem ya Palmyra yimti anüolen amenoka aliba T4 air base aser Lebanon arrtsü anasa al-Qusayr yimti anasa al-Dabaa airport dak rangloker khalokja liasü. Lebanon den arrtsü nung Iran-i teyari agütsüba Hezbollah telok nungi züngsemtem inyaksangshir.

Iranian military personnel tem den külemi Lebanon indang Hezbollah telok nungi züngsemtem airport anaprongla

nung amenoka lir aser Homs province nung Iran pusemba telungpurtem aika inyaksangshir, ta sources-isa ashi.

Anüolen aliba linük aser Israel-i, Syria nung Iran nunger military aika amenoka lir ta aitsüba Syria-i magizüki arudar. Iran nunger military ketdangser tongtitemi Syria aiben semdanga arudar.

Israel-i joko küm aika Syria nung Iran den sendaktepa aliba tesemtem aika maka arudar. Tir Bashar al-Assad lenisüba nung 2011 küm yimjung nung longkak aiterem tashiyim agi azüokba pusem tenzüka sülen Syria nung Tehran inyaksangshi taliba kümogo.


Israel-i taoba küm nungi Syria nung airport aser air bases tem taliba maka arudar. Telungpurtem nem prangbong hadir balala agütsüba atema Iran-i anüng lenmang amshiba minprongtsü atema item tesemtem maka arudar.

Taoba ita Aleppo nung airport ka Israel-i anüng ajanga amakba sülen iba airport ya anogo ana tashi inyaksangshi mesüteti liasü. February 6 nü 7.8-magnitude menoknok kati Syria aser Turkey na kanga mejungi anokshitsüba sülen iba airport ya tayimtsü ajanga osettsüset belenshitsu atema kanga tongtibang airport ka aküm.

Western intelligence source temi ashiba agi, menoknok anokba sülen linük balalai tayimtsü aika nung teyari balala bener yokba maongka agia Iran-i prangbong hadir tali bener yoktsü atema civilian airport tem taliba amshidar.

Anüolen aliba linüktem aser Israel-i parnok aitsüba dak sendakba nung Iran-i kecha telangzüba magütsü.

Petra Kvitova-i Miami Open kokogo



Rongchii/April 2, 2023 (Agencies): Honibarnü Miami Open tetsür kija asaya final nung twelfth-seeded asayar Petra Kvitova-i 7-6 (14), 6-2 agi seventh-seeded asayar Elena Rybakina madak takok ngua iba asayamung kokogo. Kvitova-i iba asayamung nung 13benbuba asayaba sülen tang mezüngbuba kokogo.

Arishi küm 33 tain asayar shiba la indang opponent dang nungi küm 10 agi tantsü lir, lai Rybakina asaya 13 tashi khen danga tamakok mongui asaya aliba raksatsüogo aser Sunshine Double (Indian Wells aser Miami Open) akoktsü aliba nokdangogo.

Iba asayamung akokba densema Kvitova-i tang tashi nung WTA kija asaya 30buba kokogo aser 2018 küm Madrid nung asayamung ka akokba sülen tang mezüngbuba asayamung ka kokogo.

Match point nung asaya aliba mapang Rybakina-i forehand agi ball court adena züktokba sülen Kvitova-i asaya

koka liasü. Iba asaya nung la indang serve khen dang break süa liasü. Iba final densema lai WTA final 41 nung asayaogo, ajisüaka Miami nung mezüngbuba final asaya liasü. Iba asaya akokba sülen la Top 10-i aitsü.

"Iba asaya akokba ajang ni maneni tajungtiba dena tokteptetsü ta jangjar. Arishi küm tain kümaka asayamung tulu koktetba atema kanga pelar," ta Kvitova-i ashi. La nem iba asayamung akokba atema senpet USD 1.26 million agütsüogo.

Kvitova, shiba Czech Republic nungi lir lai taküm Wimbledon nung Russia nung asayartem asayadaksütsü agizükba sangdongba ya magizüker. Rybakina shibai Wimbledon tesüsabuba kokogo, la ya Moscow nungi lir ajisüaka Kazakhstan tenüng nungi asayar.

Taoba mapang Wimbledon champion Kvitova-i mezüngbuba set ya tiebreaker (16-14) mapang talangka asayaba sülen set point

pongububa anguba sülenang koka liasü. Rybakina-i court adena ball züktokba sülen minute 22 asayaba tiebreaker ya tembanga liasü.

"Tiebreaker yagi asaya shibai akoktsü aji telemtetba agitsü liasü. Iba tiebreaker ya kü indang career nung talangtiba liasü. Ni tiebreaker akok anungji ni jenjang tajungba nung liasü. Tiebreak sülenbo ball kanga junga ngua kanga temulung lemteta asaya," ta Kvitova-i ashi.

Rybakina, shibai Indian Wells koka liasü, lai tiebreaker sülen belematokba lemsatop.

"Mezüngbuba set asayaba sülen tanabuba set asayatsü temela masü asü. Tanabuba asaya nungbo lai kanga sadema asaya. Tanabuba set asaya nungbo ni junga masayatet aser tera aritepa asaya," ta Rybakina-i ashi.

Kasa asayamung tebur tarep final asaya Santiago Gonzalez aser Edouard Roger-Vasselin nati 7-6 (4), 7-5 agi Krajicek aser Nicolas Mahut na kokogo.

Gabriel-i goal 2 idakja Arsenal-i Leeds United kokogo

Rongchii/April 2, 2023 (Agencies): Gabriel Jesus-i October ita sülen tang mezüngbuba goal ka idakja Leeds madak takok anguba sülen Arsenal pur Premier League nung tanabuba jenjang nung aliba team dang nungi point 8 agi timba kümogo.

Honibarnü tanabuba jenjang nung aliba Manchester City puri Liverpool akokba sülen point pongu agi dang parnok timba liasü, ajisüaka asaya mezüngbuba shilem nung Jesus'-i penalty ka ajanga mezüngbuba goal idakja Mikel Arteta-i aniba team tejakdang toktsü.

Asaya tetenzüklen Leeds puri maongka tajungba nguteta asaya aser parnok rongnungi Rasmus Kristensen, Crysencio Summerville aser Jack Harrison

nungeri Arsenal keeper Aaron Ramsdale tendanga liasü.

Ajisüaka asaya tanabuba shilem tenzüker minute anabuba nung Gabriel Martinelli-i agütsüba ball ka Ben White-i idaktsüba sülen parnok maneni jenjang mejungi aküm.

Tanabuba goal idaktsüba sülenbo Arsenal puri asaya amokbanger asaya aser Bukayo Saka melena aitba asayar Jesus-i par team atema tasembuba goal idakja liasü.

Leeds pur atema Kristensen-ia goal ka idaktsü ajisüaka asaya atemtsü minute trok anunga lia Martin Odegaard-i agütsüba ball ka Granit Xhaka-i kanga junga tongoktsüba sülen Arsenal puri asaya goal 4-1 agi ayong ayonga koka liasü.

Iba asaya makokba sülen Javi Gracia-i aniba team ya asaya 10 asayatsü anunga lia relegation zone-i point ka agi dang mai lir.

Maneni iba asaya akokba ya manager Arteta atema Arsenal coach mapa agizükba sülen tetoktepbpa ajak nung asaya 100buba anokba liasü.

Kasa mapang nung asaya metenzük tsüngda team anapronglai taoba Arsenal aser Leeds asayar David Rocastle nem tetushi agüja liasü.

League nung timtem nung aliba team Forest, Crystal Palace, Leicester aser Bournemouth nung den taruba asaya trok nung asayatsü lir anungji Gracia-i aniba team atema April ita ya kanga tongtibang asütsü.

Nagaland aser Meghalaya na semifinal masayatet

Dimapur, Rongchii/April 2 (TYO): 1buba NECDC interstate senior friendship tournament nung ajaki kanga dang yonga aliba Nagaland aser Meghalaya na tsüngda semifinal asaya tzünglu aruba ajanga tananübuba-a masayatetsüsa aküm. Asaya masayatetba ajanga Group-2 Nagaland temaba jenjang nung aliba ajanga parnok final-i iogo aser Final nung Manipur den asayatsü.

April 2 nü Nagaland team-i toss akok aser mezüng field asütsü shima aser Meghalaya team nem batting amentsü asoshi maongka agütsü. Nagaland team-i asaya kanga junga tenzük aser bowler temi Meghalaya team nungi opening batsmen tem nem run meyangludaksüi asaya aser iba mapang nung Raj Biswa, Arien Bonchang aser Wallambok Nongkhaw nung run 1, 6 aser 0 nung out süja liasü.

Iba sülen Kishan Lyngdoh (run 22) aser Kevin (run 24) nati süngjemshir asaya-a liasü. Nagaland team bowler tem rongnungi Hopongkyu Sangtam, Nagaho Chishi aser Imliwati nungeri wicket anana agi aser Tahmeed Rahman-i

wicket ka agia liasü. Ajisüaka asaya tatemlen Jaskirat (run 43) aser Akash (run 45) nati out mesüi asaya Meghalaya team-i wicket 9 out ser run 168 yangluba nung teyari tulu agütsü. Asaya ya innings shia over 38 dang asaya liasü.

Ajisüaka tanabuba innings nung tzünglu aruba ajanga masayatet aser asaya anenba mapang tashi nung asayar ka danga out mesüi over 9.1 nung Nagaland team nungi batter Hem Bahadur Chetri (run 6) aser Yugandhar Singh (run 15) na batting mena liasü.

Nagaland aser Manipur na tsüngda final asaya April 3 nü Nagaland Cricket Stadium nung 12:00 ako nungi tenzüka asayatsü.

Asayamung shibangba sentong nung Nagaland CM aser Convenor NECDC Neiphu Rio alakteta jaoker asütsü.

NAC-i asaya meimer aser pusemertem ajak dang Nagaland Cricket Stadium nung final asaya arua repringtsü jaokogo, aser nüburttem atema ground telungi aitsü asoshi Gate No. 2 lapoktsütsü ta metetdaksüogo.

Williamson temekok yiruba ajanga IPL masayatetsü

Rongchii/April 2, 2023 (Agencies): Hokolbarnü IPL 2023 nung Chennai Super Kings den mezüngbuba asaya akokba asaya nung batters Kane Williamson temekok yiruba sülen pa iba asayamung tepeyong masayatetsüsa akümba ajanga Gujarat Titans pur takoksa tulu ajuruogo.

"Asayamung nung mezüngbuba asaya Chennai Super Kings den asayaba mapang yiruba sülen Kane Williamson TATA IPL 2023 nung masayatetsüsa akümba sasasete lemsateper," ta Titans puri Twitter ajanga metetdaksü.

"Pa takaratiba nung anepa yakta asaya tenzüksü imlaja atar."

Williamson temang maneni asadangtsü atema New Zealand-i meyipa aotsü, ta club sangdong ajangsa metetdaksü.

Right-handed batter melena Gujarat Titans puri asayar tanga ka shimtsü aser mapangtong nung osang metetdaksütsü.

Arishi küm 32 tain

Williamson ya Gujarat puri wicket pongu agi Chennai akokba asaya nung boundary nung fielding amenba mapang yirua liasü.

Williamson shiba tang mezüngbuba Gujarat Titans nungi asaya liasü, pai CSK opener Ruturaj Gaikwad-i azükba ball ka six oya aliba nokdangtsü merangba mapang yirua liasü.

Pai ball ya nokdangtet ajisüaka ali nung kanga mejungi alua tsükba sülen pa temekok tachichilen yirua liasü.

Ground telung nung temekok mapang tatsüka anepaluba sülen pa anir tuguatok aser batting ameni mait aser pa melena substitute B. Sai Sudharsan fielding mena liasü. Impact Player rule kübok Titans' playing XI nung Williamson melena Sudharsan asaya liasü.

"Asayamung tetenzüklen Kane yirua masayatetsüsa akümba ya tejashitsüka lir. Pa takaratiba nung anepa yakta asayaba angütsü imlar atar," ta GT indang director of cricket, Vikram Solanki-i ashi.

BILEMDANGANG

"Na kong ali idak nungjiagi tenzüka nai inyaktetba inyakang."